



**PRAVILNIK O OSNIVANJU
PRIVREDNIH DRUŠTAVA
UNIVERZITETA U SARAJEVU**

Sarajevo, maj 2026. godine

UNIVERZITET U SARAJEVU

**PRAVILNIK O OSNIVANJU
PRIVREDNIH DRUŠTAVA
UNIVERZITETA U SARAJEVU**

S A D R Ź A J

DIO I - OPŠTE ODREDBE	3
DIO II INICIJATIVA ZA OSNIVANJE DRUŠTVA	4
DIO III POSTUPAK OSNIVANJA DRUŠTVA.....	5
DIO IV UPRAVLJANJE DRUŠTVOM.....	6
DIO V - ODNOSI UNIVERZITETA I DRUŠTVA	8
DIO VI – STATUSNE PROMJENE I PRESTANAK DRUŠTVA	9
DIO VII – PRELAZNE I ZAVRŠNE ODREDBE.....	9

U skladu sa odredbom člana 19. Okvirnog zakona o visokom obrazovanju u Bosni i Hercegovini („Službeni glasnik BiH“ broj: 59/07 i 59/09), a u vezi sa odredbama Zakona o privrednim društvima („Službene novine Federacije BiH“ broj: 81/15 i 75/21) i odredbama Zakona o registraciji poslovnih subjekata („Službene novine Federacije BiH“, broj: 27/05 i 68/05), na osnovu člana 161. stav (2) Zakona o visokom obrazovanju („Službene novine Kantona Sarajevo“ broj: 36/22 i 28/25) i člana 60. stav (1) tačka s), a u vezi sa članom 14. stav (1) alineja 31, članom 27. i članom 52. Statuta Univerziteta u Sarajevu, broj: 01-14-35-1/23 od 26. 07. 2023. godine sa pripadajućim izmjenama i dopunama, Upravni odbora Univerziteta u Sarajevu je, na prijedlog Senata Univerziteta u Sarajevu, broj: 01-11-57/26 od 29. 04. 2026. godine, na 3. redovnoj sjednici održanoj 20. 05. 2026. godine, *usvojio*

PRAVILNIK O OSNIVANJU PRIVREDNIH DRUŠTAVA UNIVERZITETA U SARAJEVU

DIO I - OPŠTE ODREDBE

Član 1.

(Predmet Pravilnika)

- (1) Ovim pravilnikom uređuju se osnivanje, statusne promjene, prestanak i način upravljanja privrednim društvima (u daljem tekstu: društvo) u kojima Univerzitet u Sarajevu (u daljem tekstu: Univerzitet) učestvuje kao osnivač ili suosnivač.
- (2) Ovim pravilnikom bliže se uređuju:
 - a) pokretanje inicijative za osnivanje društva,
 - b) izrada i sadržaj studije o opravdanosti osnivanja društva,
 - c) postupak evaluacije studije i donošenja odluke o osnivanju društva,
 - d) ostvarivanje osnivačkih prava Univerziteta u društvu,
 - e) način upravljanja društvom,
 - f) međusobni odnosi Univerziteta, njegovih članica i osnovanog društva,
 - g) druga pitanja od značaja za osnivanje i funkcionisanje društva.
- (3) Na pitanja koja nisu uređena ovim pravilnikom primjenjuju se odredbe zakona kojima se uređuje oblast privrednih društava i drugi relevantni propisi.

Član 2.

(Rodno neutralan jezik)

Izrazi koji se koriste u ovom pravilniku, a imaju rodno značenje, odnose se jednako na muški i ženski rod.

Član 3.

(Cilj osnivanja društva)

Društva u smislu ovog pravilnika osnivaju se u funkciji doprinosa trećoj misiji Univerziteta kroz jedan ili više ciljeva:

- a) komercijalizacije rezultata naučnoistraživačkog i umjetničkoistraživačkog i stručnog rada Univerziteta,
- b) transfera znanja, tehnologija i inovacija razvijenih na Univerzitetu,
- c) jačanja saradnje Univerziteta sa privredom, javnim sektorom i društvenom zajednicom,
- d) podsticanja inovacija, razvoja novih tehnologija i primjene rezultata akademskog rada u praksi,
- e) upravljanja, održavanja i unapređenja nastavne, naučnoistraživačke i ogledne infrastrukture Univerziteta uključujući specijalizirane, nastavne i terenske objekte u cilju osiguranja njihove funkcionalnosti, održivosti i razvoja.

Član 4.
(Osnivač)

- (1) Društvo u smislu ovog pravilnika osniva Univerzitet.
- (2) Društvo se osniva osnivačkim aktom, u skladu sa zakonom kojim se uređuju privredna društva.
- (3) Društvo može osnovati Univerzitet samostalno ili zajedno sa drugim fizičkim ili pravnim licima, u kojem slučaju se međusobni odnosi osnivača uređuju osnivačkim aktom ili drugim odgovarajućim ugovorom, u skladu sa zakonom.
- (4) Društvo se može osnovati na određeno ili neodređeno vrijeme, što se bliže uređuje osnivačkim aktom društva.

Član 5.
(Oblik i status društva)

- (1) Društvo u smislu ovog pravilnika osniva se kao društvo sa ograničenom odgovornošću (d.o.o.).
- (2) Izuzetno, društvo se može osnovati i u drugom obliku privrednog društva ukoliko je to opravdano prirodom djelatnosti, poslovnim modelom ili potrebom uključivanja drugih osnivača.
- (3) Društvo je pravno lice koje samostalno obavlja djelatnost u skladu sa zakonom, Statutom Univerziteta i ovim pravilnikom, radi ostvarivanja ciljeva iz člana 2. ovog pravilnika i sticanja dobiti.
- (4) Društvo može, na osnovu posebne odluke nadležnog tijela Univerziteta, koristiti finansijske i/ili infrastrukturne resurse Univerziteta, pod uslovima utvrđenim posebnim ugovorom, uz primjenu propisa o državnoj pomoći, javnoj imovini i transfernim cijenama.

DIO II INICIJATIVA ZA OSNIVANJE DRUŠTVA

Član 6.
(Inicijativa)

- (1) Inicijativu za osnivanje društva mogu pokrenuti:
 - a) članica Univerziteta,
 - b) više članica Univerziteta zajedno,
 - c) Rektorat Univerziteta,
- (2) Inicijativa iz tačaka a) i b) stava (1) ovog člana pokreće se donošenjem odluke vijeća članice, odnosno vijeća članica Univerziteta.
- (3) Inicijativa iz tačke c) stava (1) ovog člana pokreće se donošenjem odluke Senata Univerziteta, putem Centra za istraživanje i razvoj Univerziteta.
- (4) Inicijativa iz stava (1) ovog člana sadrži sljedeće:
 - a) osnovne podatke o planiranom društvu,
 - b) razloge osnivanja društva,
 - c) prijedlog djelatnosti društva,
 - d) prijedlog osnivačkog kapitala društva, uključujući izvor i okvirni iznos kapitala,
 - e) podatke o eventualnim resursima, infrastrukturi ili drugim oblicima imovine Univerziteta ili članice koji bi se koristili za potrebe društva,
 - f) druge relevantne informacije od značaja za razmatranje inicijative.

Član 7.
(Saglasnost za izradu studije opravdanosti)

- (1) Senat Univerziteta donosi odluku o davanju saglasnosti za izradu studije o opravdanosti osnivanja društva.
- (2) Izuzetno, u slučajevima kada je to propisano zakonom ili drugim propisom kojim se uređuje raspolaganje imovinom u javnom vlasništvu, za osnivanje društva pribavlja se i saglasnost osnivača Univerziteta.

DIO III POSTUPAK OSNIVANJA DRUŠTVA

Član 8.

(Sačinjavanje studije)

- (1) Sačinjavanju studije o opravdanosti osnivanja društva prethodi saglasnost Senata Univerziteta.
- (2) Na prijedlog podnosioca inicijative iz člana 6. ovog pravilnika, studiju o opravdanosti osnivanja društva sačinjava izrađuje stručni tim Univerziteta, kojeg imenuje Senat Univerziteta.
- (3) Sastav stručnog tima mogu činiti i fizička lica koja nemaju zasnovan radni odnos na Univerzitetu ili pravna lica, radi pružanja stručne podrške u izradi studije.

Član 9.

(Sadržaj studije)

Studija o opravdanosti osnivanja društva obavezno sadrži:

- a) razloge i ciljeve osnivanja društva,
- b) opis inovacije, tehnologije ili znanja koje je predmet komercijalizacije,
- c) procjenu tržišnog potencijala,
- d) poslovni plan društva,
- e) procjenu finansijske održivosti društva,
- f) prijedlog vlasničke strukture i kapitala društva,
- g) plan korištenja resursa Univerziteta,
- h) procjenu uticaja planiranog društva na društvenu zajednicu, okoliš i principe održivog razvoja,
- i) izjavu o nepostojanju sukoba interesa,
- j) druge relevantne informacije od značaja za evaluaciju studije.

Član 10.

(Evaluacija studije)

- (1) Rektor Univerziteta imenuje komisiju za evaluaciju studije o opravdanosti osnivanja društva.
- (2) Komisija se sastoji od pet do devet članova.
- (3) Komisija može donijeti odluku o:
 - a) prihvatanju studije,
 - b) dorade studije,
 - c) odbijanje studije kao neopravdane.

Ukoliko je osnivanje društva povezano sa komercijalizacijom intelektualnog vlasništva Univerziteta, pribavlja se pozitivno mišljenje Komisije za intelektualno vlasništvo Univerziteta.

Član 11.

(Odluka o osnivanju)

- (1) Senat Univerziteta utvrđuje prijedlog za osnivanje društva.
- (2) Odluku o osnivanju društva, na prijedlog Senata Univerziteta, donosi Upravni odbor Univerziteta.
- (3) Odluka iz stava (2) ovog člana predstavlja osnivački akt društva ukoliko je Univerzitet jedini osnivač.
- (4) Osnivački akt društva koje Univerziteta osniva sa drugim fizičkim ili pravnim licima je ugovor o osnivanju društva.

Član 12.

(Registracija društva i drugi upisi)

- (1) Postupak registracije društva kod nadležnog suda provodi se u skladu sa Zakonom o registraciji poslovnih subjekata FBiH.
- (2) Nakon upisa društva u sudski registar, društvo je dužno izvršiti registracije i upise kod nadležnih poreznih, statističkih i drugih organa i institucija, u skladu sa važećim propisima.

Član 13.

(Statut društva)

- (1) Društvo ima statut kao opći akt kojim se bliže uređuju organizacija, upravljanje i druga pitanja od značaja za poslovanje društva.
- (2) Statut društva donosi skupština društva, na prijedlog podnosioca inicijative iz člana 6. ovog pravilnika, uz prethodnu saglasnost Upravnog odbora Univerziteta.
- (3) Statut iz stava (2) ovog člana donosi se u roku utvrđenom osnivačkim aktom društva, koji ne može biti duži od 60 dana od dana upisa društva u registar kod nadležnog suda.

DIO IV UPRAVLJANJE DRUŠTVOM

Član 14.

(Organi društva)

- (1) Organi društva su:
 - a) skupština društva,
 - b) nadzorni odbor,
 - c) uprava društva.
- (2) Društvo može imati i druga savjetodavna tijela i komisije.
- (3) Organizacija, sastav, način rada i međusobni odnosi organa društva uređuju se osnivačkim aktom i statutom društva, u skladu sa zakonom i ovim pravilnikom.

Član 15.

(Skupština društva)

- (1) Funkciju skupštine društva vrši Univerzitet kao osnivač, putem nadležnih tijela Univerziteta, u skladu sa zakonom, Statutom Univerziteta i ovim pravilnikom.
- (2) U vršenju funkcije skupštine društva, Univerzitet osigurava učešće podnosilaca inicijative iz člana 6. ovog pravilnika, naročito u dijelu koji se odnosi na:
 - a) predlaganje kandidata za organe društva,
 - b) davanje mišljenja na ključne odluke u vezi sa razvojem i poslovanjem društva,
 - c) praćenje realizacije ciljeva osnivanja društva.
- (4) Skupština društva odlučuje o pitanjima iz svoje nadležnosti, a naročito o:
 - a) statusnim promjenama društva i promjeni podataka značajnih za pravni promet,
 - b) imenovanju i razrješenju uprave društva,
 - c) raspodjeli dobiti i pokriću gubitaka,
 - d) povećanju ili smanjenju osnovnog kapitala,
 - e) usvajanju godišnjeg izvještaja o radu i finansijskom poslovanju društva,
 - f) drugim pitanjima u skladu sa zakonom i osnivačkim aktom.
- (5) Način ostvarivanja prava iz stava (2) ovog člana, kao i međusobni odnosi Univerziteta i podnosilaca inicijative, bliže se uređuju osnivačkim aktom i statutom društva.

Član 16.

(Nadzorni odbor)

- (1) Nadzorni odbor je organ društva koji nadzire zakonitost rada i poslovanje društva.
- (2) Nadzorni odbor ima pet članova.
- (3) Članove nadzornog odbora imenuje i razrješava skupština društva, na prijedlog Senata Univerziteta, uz prethodnu saglasnost Upravnog odbora Univerziteta.
- (4) Prilikom imenovanja članova nadzornog odbora:
 - a) tri člana predlažu podnosioci inicijative iz člana 6 ovog pravilnika,
 - b) dva člana predlaže Rektor Univerziteta.

- (5) Članovi nadzornog odbora imenuju se na period od četiri godine, uz mogućnost jednog ponovnog imenovanja.
- (6) Nadzorni odbor naročito:
- nadzire vođenje poslovanja društva,
 - razmatra i daje mišljenje na godišnje izvještaje o radu i finansijskom poslovanju društva,
 - predlaže skupštini društva donošenje odluka iz njene nadležnosti,
 - pokreće inicijativu za razrješenje uprave,
 - vrši i druge poslove u skladu sa zakonom i statutom društva.
- (7) Postupak imenovanja i razrješenja članova nadzornog odbora, kao i druga pitanja od značaja za njegov rad, uređuju se statutom društva.
- (8) Ukoliko se društvo osniva Univerzitet samostalno ili zajedno sa drugim fizičkim ili pravnim licima, u kojem slučaju se međusobni odnosi osnivača uređuju osnivačkim aktom ili drugim odgovarajućim ugovorom, u skladu sa zakonom.
- (9)

Član 17. **(Uprava društva)**

- (1) Poslovanje društva vodi i društvo zastupa uprava.
- (2) Upravu društva čini direktor.
- (3) Osnivačkim aktom ili statutom društva može se predvidjeti da, pored direktora, upravu čine i druga lica (izvršni ili tehnički direktori, zamjenici direktora).
- (4) Direktor u radu mogu pomagati stručna lica i savjetodavna tijela ili komisije, u skladu sa statutom društva.
- (5) Uprava je odgovorna za zakonitost rada i poslovanja društva, kao i za ostvarivanje ciljeva zbog kojih je društvo osnovano.
- (6) Ovlaštenja, odgovornosti i način rada uprave bliže se uređuju osnivačkim aktom i statutom društva.

Član 18. **(Direktor društva)**

- (1) Direktora društva imenuje i razrješava skupština društva.
- (2) U postupku imenovanja direktora uzima se u obzir prijedlog podnosioca inicijative iz člana 6. ovog pravilnika, u zavisnosti od djelatnosti društva.
- (3) Direktor se imenuje na period od četiri godine, uz mogućnost ponovnog imenovanja.
- (4) Za direktora može biti imenovano:
- lice koje ima zasnovan radni odnos na Univerzitetu, ili
 - lice koje nije u radnom odnosu na Univerzitetu.
- (5) Prava, obaveze i status direktora uređuju se ugovorom, u skladu sa popisima o radu i statutom društva.
- (6) Ukoliko je direktor društva lice koje u radnom odnosu na Univerzitetu, njegov status, prava, obaveze i odgovornosti uređuje se ugovorom o obavljanju poslovodne funkcije bez radnog odnosa, uz obavezno uređenje pitanja sukoba interesa.
- (7) Inicijativu za razrješenje direktora u skladu sa statutom društva mogu pokrenuti:
- nadzorni odbor društva,
 - Senat Univerziteta,
 - Upravni odbor Univerziteta,
 - rektor Univerziteta,
 - vijeće članice podnosioca inicijative iz člana 6. ovog pravilnika.

Član 19. **(Prokura)**

- (1) Društvo može imati jednog ili više prokurista u skladu sa zakonom kojim se uređuju privredna društva.

- (2) Prokuristu imenuje skupština društva, uz prethodnu saglasnost Upravnog odbora Univerziteta.
- (3) Obim ovlaštenja prokuriste utvrđuje se odlukom o imenovanju, u skladu sa zakonom.

Član 20.

(Izvršavanje i nadzor Univerziteta)

- (1) Nadzorni odbor društva dužan je najmanje jednom godišnje dostaviti Univerzitetu izvještaj o radu i finansijskom poslovanju društva.
- (2) Izvještaj iz stava (1) ovog člana razmatraju Senat i Upravni odbor Univerziteta.
- (3) Ukoliko Senat i Upravni odbor Univerziteta ne prihvate izvještaj iz stava (1) ovog člana, rektor Univerziteta pokreće postupak preispitivanja odgovornosti nadzornog odbora i uprave društva, u skladu sa statutom društva.

DIO V - ODNOSI UNIVERZITETA I DRUŠTVA

Član 21.

(Ugovorni odnosi između Univerziteta i društva)

- (1) Međusobni odnosi između Univerziteta i društva uređuju se posebnim ugovorom, u skladu sa zakonom, Statutom Univerziteta i ovim pravilnikom.
- (2) Ugovor iz stava (1) ovog člana naročito uređuje:
 - a) korištenje infrastrukture, opreme i drugih resursa Univerziteta,
 - b) prava i obaveze zaposlenih i angažovanih lica,
 - c) način obračuna i raspodjele prihoda, uključujući naknade za licenciranje i korištenje resursa,
 - d) način korištenja naziva, znaka, intelektualne svojine Univerziteta,
 - e) način upravljanja, održavanja i korištenja nastavnih i oglednih objekata koji su povjereni društvu na upravljanje.
 - f) druga pitanja od značaja za rad i poslovanje društva.
- (3) Odnosi iz stava (1) ovog člana zasnivaju se na principu tržišne vrijednosti, u skladu sa propisima o transfernim cijenama i drugim relevantnim propisima.

Član 22.

(Intelektualno vlasništvo)

- (1) Na pitanja stvaranja, zaštite, prenosa, licenciranja i komercijalizacije intelektualnog vlasništva primjenjuju se odredbe općeg akta Univerziteta kojim se uređuje upravljanje intelektualnim vlasništvom. Odnosi između Univerziteta, društva i trećih lica u vezi sa intelektualnim vlasništvom uređuju se ugovorom, uz uvažavanje doprinosa i interesa ugovornih strana.

Član 23.

(Zaštita interesa Univerziteta i članica)

- (1) Univerzitet i njegove članice dužni su osigurati zaštitu svojih legitimnih interesa prilikom uspostavljanja odnosa sa društvom i trećim licima.
- (2) Zaštita iz stava (1) ovog člana naročito obuhvata:
 - a) upravljanje intelektualnim vlasništvom,
 - b) zaštitu finansijskih interesa,
 - c) očuvanje akademske i istraživačke autonomije.
- (3) Prenos prava na intelektualnom vlasništvu sa Univerziteta ili članica na društvo vrši se na osnovu ugovora, u skladu sa važećim propisima.

Član 24.

(Raspodjela dobiti i pokriće gubitka)

- (1) Dobit društva raspodjeljuje se u skladu sa udjelima osnivača, ako osnivačkim aktom ili ugovorom nije drugačije određeno.
- (2) Odluku o raspodjeli dobiti donosi skupština društva.
- (3) Gubitak društva snosi se u skladu sa zakonom i udjelima osnivača, ako osnivačkim aktom nije drugačije uređeno.

DIO VI – STATUSNE PROMJENE I PRESTANAK DRUŠTVA

Član 25.

(Statusne promjene društva)

- (1) O statusnim promjenama društva u kojem Univerzitet učestvuje kao osnivač ili suosnivač odlučuje skupština društva, u skladu sa zakonom, osnivačkim aktom i statutom društva.
- (2) Prije odlučivanja o statusnim promjenama društva pribavlja se prijedlog Senata Univerziteta i prethodna saglasnost Upravnog odbora Univerziteta.
- (3) Statusne promjene društva, promjena oblika društva i promjena firme društva provode u skladu sa zakonom kojim se uređuje oblast privrednih društava.

Član 26.

(Prestanak društva)

- (1) Društvo prestaje u skladu sa zakonom kojim se uređuju privredna društva i drugim relevantnim propisima.
- (2) O pokretanju postupka prestanka društva, kada za to postoje razlozi u interesu Univerziteta, odlučuje Upravni odbor Univerziteta na prijedlog Senata Univerziteta.
- (3) Odluka iz stava (2) ovog člana dostavlja se nadležnim organima i institucijama, u skladu sa zakonom.

Član 27.

(Likvidacija i drugi postupci prestanka)

- (1) Ako društvo prestaje na osnovu odluke osnivača ili iz drugih razloga propisanih zakonom, provodi se odgovarajući postupak prestanka u skladu sa važećim propisima.
- (2) Na pitanja likvidacije, stečaja i drugih oblika prestanka društva primjenjuju se odredbe zakona kojima se uređuju privredna društva, likvidacioni i stečajni postupak.

DIO VII – PRELAZNE I ZAVRŠNE ODREDBE

Član 28.

(Supsidijarna primjena propisa)

Na pitanja koja nisu uređena ovim pravilnikom primjenjuju se odredbe zakona i drugih propisa kojima se uređuje oblast privrednih društava, registracije poslovnih subjekata, upravljanja intelektualnim vlasništvom, kao i drugih relevantnih propisa.

Član 29.

(Primjena pravilnika na postojeća društva)

- (1) Odredbe ovog pravilnika primjenjuju se i na društva u kojima se Univerzitet, njegova članica ili više članica javljaju u svojstvu osnivača, suosnivača ili člana društva prije stupanja na snagu ovog pravilnika.

- (2) Postojeća društva iz stava (1) ovog člana dužna su svoje opće akte, organizaciju i način upravljanja uskladiti sa odredbama ovog pravilnika u roku od 12 mjeseci od dana njegovog stupanja na snagu, ukoliko to nije u suprotnosti sa kogentnim propisima ili preuzetim ugovornim obavezama.

Član 30.

(Tumačenje pravilnika)

Tumačenje odredaba ovog pravilnika daje Upravni odbor Univerziteta.

Član 31.

(Izmjene i dopune pravilnika)

Izmjene i dopune ovog pravilnika vrše se po postupku propisanom za njegovo donošenje.

Član 32.

(Nadzor nad primjenom pravilnika)

Nadzor nad primjenom ovog pravilnika vrši rektor Univerziteta, kao odgovorno lice Univerziteta.

Član 33.

(Stupanje na snagu)

Ovaj pravilnik stupa na snagu osmog dana od dana objavljivanja na internet stranici Univerziteta.

**V.D. PREDSJEDNICA
UPRAVNOG ODBORA**

Dr. sc. Mersiha Kolčaković



Broj: 02-9-6-1/26

Datum: 20. 05. 2026. godine

